

Dálle á Lingua

PUBLICACIÓN TRIMESTRAL DO EQUIPO DE NORMALIZACIÓN LINGÜÍSTICA DO IES DE MELIDE

TODOS ÁS RÚAS. NON AO PLAN BOLONIA!!!

O día 22 de outubro fixemos no instituto unha folga para protestar contra o Plan Bolonia. Este plan pretende:

- Retirar as bolsas universitarias, pasando estas a ser préstamos que haberá que devolver ao rematar a carreira.
- Endurecer a selectividade, introducindo unha proba oral de idioma que favorecerá aos estudiantes que poidan permitirse acudir a academias privadas.
- Obter unha nota superior ou igual a cinco para aprobar o selectivo (ata o de agora, o aprobado estaba no catro).
- Endurecer o acceso ás carreiras más solicitadas introducindo, en teoría, probas voluntarias pero que realmente serán obligatorias e no resultado final contarán máis que o propio bacharelato.

Ao igual que moitos outros centros, manifestámonos no noso instituto e logo polo centro do pobo. Comezamos lendo un manifesto no patio interior, que tiñamos escrito de antemán explicando en que consistía o Plan Bolonia, e repartimos pancartas entre os alumnos para que puidesen participar no acto, con lemas como "**Non á privatización**", ou "**Non ao Plan Bolonia**". Ao rematar coa lectura, os alumnos de 2º ciclo e bacharelato dirixímonos á Praza do Convento e limos de novo o manifesto diante do Concello (alí estaban a alcadesa e outras persoas). Logo fomos polas rúas de Melide, protestando e recollendo firmas entre os cidadáns que apoiaban a folga. Xa para rematar, dirixímonos todos ao centro e seguimos recollendo firmas entre profes e alumnos.



Raquel Conde e Noelia Varela (B1ºC)



EDITORIAL

Ola compañeir@s! Xa estamos de novo aquí!

Comezamos dando a benvida aos novos colaboradores deste numero de *Dálle á Lingua*.

Ñáñaras é unha palabra galega que pode definir a unha persoa débil ou con pouco espírito. Daquela, non sexamos ñáñaras co noso idioma e animádevos todos a participar! Porque xeralmente só estamos orgullosos da nosa lingua o 17 de maio co fin de participar na conmemoración das Letras Galegas (un festivo moi xioso, non é así?). Pois a nosa lingua

debería estar presente o 17 de maio e os 364 días restantes do ano!

Aproveitando a chegada ao noso instituto de novos rapaces procedentes de fóra de Galicia, animámolos a que venzan a súa vergoña individual e se animen a intentar expresarse en galego, xa que un idioma apréndese dende mal-falar ata chegar ao ben-falar.

Fagamos que a nosa lingua non teña límites nin fronteiras. Acollamos no noso territorio non só a novos habitantes, senón tamén a novos falantes! ☺

Ana Sánchez , Esmeralda Seijas e Laura Vázquez

NOVAS DO CENTRO

Pensas que no IES de Melide, o noso IES, non se fai nada? Que non hai actividades nin dentro nin fóra do centro? Pois non! Estás enganado/a! Se les este artigo demostrarémoscho.



Para comenzar, o día 22 de outubro houbo unha folga organizada pola Asociación de Alumnos contra o Plan Bolonia. Seguimos cunha actividade dirixida aos alumnos de 4º de ESO. Os seus intérpretes foron: Iria, Diego, Bruno (alias Ramón) de 4ºA e Yoly, Diego, Anita e Alejandro de 4ºB. Esta actividade realizada na aula de audiovisuais consistiu na lectura dramatizada da obra "O mexillón" na que se plasman as consecuencias da cobiza nun grupo de amigos. Os intérpretes practicaron a obra cos seus compañeiros na clase, e o mesmo día recibieron a visita de Fusa que lles deu unha pequena clase de interpretación dramática. Xa estaba todo listo, a obra levouse a cabo con éxito, e ao remate desta, os

espectadores preguntáronlle as súas dúbidas a Fusa.

Os alumnos de tecnoloxía de 2º ciclo e bacharelato tiveron o privilexio de asistir a unha sesión de maxia, realizada no pavillón do IES. Polo visto foron uns noventa minutos bastante entretidos e con activa participación do alumnado.

O día de San Martiño, 11 de novembro, os alumnos do primeiro ciclo de ESO botáronse á rúa baixo o lema: "Polo San Martiño, peóns ao camiño". Tras o reparto de peóns no recinto do IES, os rapaces e os mestres acompañados dalgúns alumnos de 4º, saíron cara a Praza do Convento, onde se leu un manifesto e se xogou cos peóns, tal e como se facía nos vellos tempos.

O 20 de novembro organizouse unha carreira solidaria co obxectivo de recadar diñeiro para os nenos do Níger. Nesta carreira, cadaquen podía dar o que quixera, aínda que o establecido eran cincuenta céntimos por volta dada ao circuíto montado no patio do IES. Os cartos recadados foron doados á ONG "Save the children" que se encargará de distribuílos, construíndo pozos. Para homenaxear ás mulleres que este ano foron vítimas da violencia de xénero, o 25 de novembro colocouse polas paredes dos corredores unhas cartolinhas negras que

representaban ás mulleres mortas, indicando o lugar e as circunstancias nas que faleceron. Tamén se colgaron necrolóxicas e algúns alumnos de bacharelato colgaron outros traballos co fin de concienciar á xente sobre este problema que afecta á nosa sociedade.

Realizouse unha folga para reclamar que se cumpra o establecido no decreto de mínimos do galego.



Por último, pero non por iso menos importante, o 1 de decembro, conmemorouse o día contra o VIH. Os alumnos de bacharelato asistiron á proxección dunha película e unha charla. Ao remate repartíronllles preservativos. O resto do alumnado recibiu adhesivos e lápices.

Doa, Laura e Iria (S4ºA).

NOVAS_DA_LINGUA

Falar non ten cancelas...! Iso debeu pensar George Steiner, cando alá polo mes de agosto comentou o seguinte: ... *Mais non me compare o catalán co galego! O catalán é un idioma importante, cunha literatura impresionante. Porén o galego, por que ha ser obligatorio nunha universidade?* Menos mal que este señor é Premio Príncipe de Asturias das Humanidades e da Comunicación no 2001

Un grupo de mozos de Compostela propúxose como meta que a RAE (Real Academia Española) elimine as acepcións de "tonto" e "tartamudo" do termo "gallego". Están recollendo firmas... se es galego, pero non es nin tonto nin tatexo, bótalles unha man, ho!

A Asociación de Escritores en Lingua Galega propón unha idea ben interesante: *Palabras con memoria*, é unha iniciativa que ten por obxectivo recuperar palabras e expresións galegas en perigo de extinción. Se visitas a súa páxina podes consultar o glosario e engadir novas entradas. Axúdalles a que a nosa lingua non esmoreza...



Rematamos cunha nova musical. Vén de celebrarse o corenta aniversario da formación "Voces Ceibes", un colectivo que se presentou na Universidade de Santiago, na primavera do 1968. Musicaron poemas de Celso Emilio, Ferrín, Rosalía... tentando achegar a nosa cultura ao pobo, a través da música. A maior parte dos textos levaban unha profunda carga de denuncia social. Os seus integrantes: Xerardo Moscoso, Xavier, Vicente Araguas, Benedito, Bibiano, Guillermo e Miro Casabella.


...

e está considerado un experto en literatura comparada.

Sabes que o secretario do movemento "Mesa por la libertad Lingüística", comparou a normalización lingüística coas relacións sexuais non consentidas? Considera a "imposición" do galego como unha violencia exercida contra quen non quere falar galego, un "idioma imposto"... Como dicía Fulano, cada quen fala da feira segundo lle foi nela...

A Dirección Xeral de Xuventude e Solidariedade levará a cabo ata outubro do 2010 un proxecto que pretende a aprendizaxe de linguas nacionais a través de voluntarios. É un programa promovido pola Unión Europea, e no que colaboran representantes de Galicia, Holanda, Francia e Grecia. A idea consiste en potenciar o uso de linguas minoritarias e está destinado principalmente a mozos con bolsas Erasmus ou Leonardo, inmigrantes, ou persoas non galegas que pasen un período longo de tempo no noso país.

E XA POSTOS A RECUPERAR A MEMORIA HISTÓRICA SERÍA COUSA DE BUSCAR AS NOSAS RAÍCES



TOXOS E FLORES

Desta volta os **toxos** van dedicados ao foro "Tan gallego como el gallego", que defende o castelán e insinúa que o galego non é unha lingua digna. Ademais, neste foro aparecen comentarios denigrantes cara aos galegofalantes.

Por sorte, non todos critican ao galego, senón que o defenden, por iso queremos dedicarle as **flores** a esos grupos musicais que utilizan a nosa lingua para cantar pop, rock... e que fan que non se vexa como unha lingua que só serve para a música folclórica. Estamos a falar de grupos como *Relevancia cero*, *Herdeiros da crus*, *Ataque escampe*, *Dios que te crew...*

Contesta correctamente a estas cuestións e encontrarás unha palabra secreta!

- 1-Obxecto utilizado para levar gardadas as troitas ata a casa.
- 2-Utensilio no que está suxeito a sedela, e que serve para soltarlo e recollella.
- 3-Arte de pesca na que se usa unha sedela más grosa (3 palabras).
- 4-Utensilio que serve para quitarles o anzol da boca ás troitas.
- 5-Cebo utilizado para a pesca do peixe.
- 6-Anélido usado na pesca da troita, sen lance e con cola longa.

Noel Alba (S3ºC)

DÁLLE Á LINGUA


Ano XV, nº 26, Decembro 2008.

Dálle á Lingua é responsabilidade do Colectivo "Lugrís Freire", grupo de traballo do Equipo de Normalización e Dinamización Lingüística do IES de Melide.

Consello de Redacción: Raquel Conde, Noelia Varela, Ana Sánchez, Esméralda Seijas, Laura Vázquez; Doa, Laura e Iria (S4ºA), Andrea Vázquez, Judith Ramos, Noel Alba, Blas Agra.

Maquetación: Belén.



Non me sexas CHOUPELETIIIIÑAS!!!! Xa sei que querías mandar algo para este número pero botáronse enriba os exames!!! Non pasa nada... O teu artigo ten cabida no próximo número!



Canto sabes sobre os muíños?

- 1-Parte inferior do muíño.
- 2-Parte do muíño na que se bota o gran.
- 3-Parte do muíño que reparte o gran entre as rodas (2 palabras).
- 4-Persoa que moe o gran.
- 5-Parte do muíño que desfai o gran (2 palabras).
- 6-Parte do muíño pola que sae o gran xa moído (3 palabras).
- 7-Parte do muíño na que se deposita o gran xa moído.

Blas Agra Varela (S3ºA)



ENCrucillados